

REGIONAL NEWS BULLETIN

HEADLINES (*EVENING*)

- 1. BJP MLA Dr. K. Beichhua chuan sorkar chu MUHCS chu Sorkar hnathawkte leh Private Hospital neitute nen sawi hova harsatna a thlen hmaa ennawn leh ngei turin a phut tih a sawi.
- 2. Lengpui Airport chu Union Home Minister Amit Shah-AAI kuta dah a nih tur thu a sawi chu chaktaka um zui turin Lengpui Airport Forum chuan sorkar a ngen.
- 3. India leh Sri Lanka chuan ralthuam, energy, leh sumdawnna lam tihhmasawna tur inremna an zia
- 4. Danlova ramri kan ruk tum Pakistani mi pakhat sipaiten Jammu and Kashmir ah an kaphlum.



HEALTH CARE SCHEME-OPPSN REACTION

BJP MLA Dr. K. Beichhua chuan ZPM sorkar chuan Universal Health Care Scheme hnuaiah Sorkar hnathawkte, Private Hospital neitute nen mumal taka sawi hova harsatna a thlen hmaa ennawn leh ngei turin a phut tih a sawi.

Dr Beichhua chuan nimina BJP State Office a thu a sawinaah Kalphung thar Sorkarin mipui Healthcare tia a kalpui chu Healthcare vanduaithlak tak a ni, a ti a, Sorkar hnathawkin hamthatna an hmuh zinga anmahni humhingtua an ngaih chu Medical Reimbursement a ni a, Medical Attendant Rule ah he hamthatna hi tun thlengin sawisela leh lungawilohna engmah awm lovin lawm takin an la mek a. Chutihlain tun Sorkarin Mizoram Universal Health-care Scheme-a Sorkar hnathawkte barluh an ni chu a vanduaithlak takzet a. Hei hi Sorkar hian a rang lamin chingfel se a duh tih a sawi a ni.

Dr K Beichhua chuan, MLA-te pawh he Scheme hnuaia thun luh tum mek an ni a ti a, an duh dawn nge dawn lo tih hi ngun taka an ngaihtuah ngai a ti a ni. PM Healthcare (AB-PMJAY) Kum 2018 atanga hman tan tawh chu, tun sorkar hian a laimu ah dahin fuh ti takin a kawr rawng dangin an chei mai mai ang tih a hlauhawm hle a, thla hnih-khat hnua AB-PMJAY kawra rawng dang an lo hnawih Health-care Scheme chu a nihna dik tak a lo lang tawh ang a, Sorkar pawh in tifuh an inti kher lovanga, buaina namen lo an tawh ngei ang a ti.

Sorkarna vuantute chu mipui aiawha thlan tlin an nih angin, mipui thatna turah chuan inphahhniam a tul hnunah inphahhniamin, thuneitu zawk an nih vanga harsatna cho chhuak kher lovin, Stakeholder te nen Dawhkan khat kila mipui tan remna an zawn a tul takzet a ni," a ti bawh.

Health Care Scheme chhawr theihna Hospital empanelment chungchangan State pawn lama Hospital Empanelled chu 20 an ni a, chung ho pawh chu deemed Empanelled an ni chauh a, MoU sign pui pakhatmah an awm lo a. State chhungah Private Hospital tam tak zingah damdawiin pa 6 chauh in an pawm a, Private Hospital Association te'n an pawm lo thung a ni, a ti.

Mizoram Pradesh Congress Committee President Pu Lalthanzaran ZPM Sorkarin Health Care a kalpui dan turah mipui leh Sorkar hnathawk atangin pawisa tam tak lak sak tumna a awm a ti.

Pu Lalthanzara chuan an party inkhawmah he thu hi sawiin Health Care scheme chhawr tangkaitu tur mirethei tak tak zawkten he scheme hi an chhawr tangkai thei angem tih chu ngaihtuah tham tak a ni a ti.

MPCC thupuangtu Dr.Lallianchhunga chuan ZPM sorkar Universal Healthcare Scheme chu a tak takah chuan sorkar hnathawk awm ve lohna chhungkaw tam zawk tan tel ve ngaihna a awm lo a ni a ti a. A chhan chu an intiam anga sawhthing an leisak theih loh avangin khawtualah sum lengvak a tlem a, YMA Chhiatni Fund khawn hun chhung pawh khaw thenkhatah chuan an pawhsei phah hial a ni, a ti

ZPM Healthcare Scheme duan chu, sorkar hnathawk ten an duh lova, Private Hospital lian tak takin an pawm thei lo va, sorkar hnathawk awm lohna chhungkaw tam tak tan inziah luhna Fee a tam lutuk a, an chhawr ve pha dawn lo a a ni a ti bawk.



OPERATION BRAHMA

Operation Brahma hnuaia India in Myanmar-a lirnghing tuarte a tanpuina tur Indian Air Force sipai thlawhna in April ni 1-a Lengpui thlawhna tumhmuna a rawn phurh thlen chu tunkar nilaini khan truck hmangin Zokhawthar ah phurh thlen a ni.

United State siam sipai thlawhna C-17 Globemaster Indian Air Force ta hian metric tonne 65 zeta rit mipui mamawh hrang hrang a rawn phur a, heng a rawn phurh te hi tui intur, buhfai, damdawi, mut bu te leh in enkawl na atana mamawh hrang hrang te an ni a, nilaini khan heng tanpuina tur hrang hrang hi Assam Rifles truck hmangin Zokhawthar lamah phurh thlen an ni a, heta tang hian Myanmar ramah lakchhawn leh a ni.

Chin State-a mipui sipai hruaitute chuan lirnghing tanpuina tur chu dodal an tum lo a ti a, an mi leh sa te an inhrilh lawk vek tawh tih sawiin tluang takin tanpui ngai te hnen thlentir an duh tih an sawi bawk.

Prime Minister Narendra Modi chuan Bangkok khawpuia BIMSTEC Summit ah Myanmar Senior General Min Aung Hlaing chu hmuin tunhnaiah lirnghing avanga chhiatna an tawh chu a tawrhpu i takzet thu a hrilh a, India chuan a theih angin a pui zel dawn tih sawiin ram hruaitu pahnih te hian inpawhna tur leh hmasaw nna tur hrang hrang an sawi dun a ni.

Voicecast -

*Operation Brahma tia vuah Lirnghing avanga chhiatna hrang hrang thleng leh inchhanchhuahna hna thawhna tura India sipaite hmalakna hi thla liamta March ni 29 khan bultan a ni a, he hmalakna ah hian India mithiam hrang hrang damdawi lam leh lirnghing sawhkhawk tuar te sawngbawl tura mithiam bik te chuan Myanmar rama lirnghing tuar te an enkawl dawn a, heng bakah hian India sawrkar chuan Myanmar ah hian tanpuina thahnem tak thlawhna leh lawng hmangin a thawn lut bawk a ni.*



MURDER

Kolasib District chhung Buhchangphai bul Zukbual leilet zaua leilet pakhat enkawltu Khalil Uddin Barbhuiya kum 40 mi chuan nimin khan a nupui Hassan Begum Barbhuiya kum 35 mi chu chempui in a hrawk ah a zai a, Hassan Begum Barbhuiya hi a hmun ah a thi nghal. Tualthattu a puh Khalil Uddin Barbhuiya hi tlanbo in, man tuma zawn mek ani in, Vairengte Police Station ah thubuai ziahluh ani.

Thudawnna in a tarlan danin, Hassan Begum Barbhuiya hi a pasal remtihna in thla kalta March ni 25 khan an khua Katlicherra, Hailakandi District, Assam ah a chhungte tlawh tur angin a zin a, a ngaihzawng ni a hriat nen an tlan dun a, hemi chanchin a hriat hian a pasal leh a pasala thiante chuan an zawng nghal a, an zawn hmuh hnu in an chenna In ah an hruai haw nghal a no.

Hassan Begum Barbhuiya ruang hi vawiin khan Kolasib District Hospital ah postmortem anih hnuin ruang hi a chhungte hnenah hlan ani.

<><><>

AVBD

Association for Voluntary Blood Donation (AVBD) chuan Financial year 2024-25 chhungin Mizoramah a thlawna thisen pe zaa 93.71 a nih thu sawiin, Mizoram in target a siam zaa 92 a khum a ni.

Mizoram puma thisen pek dinhmun chhinchhiahtu Blood Transfusion Service, Mizoram State AIDS Control Society (MSACS)-in an chhinchhiah danin, nikum April ni 1 atanga kumin March ni 31 thleng khan Mizorama blood centre 11-ah thisen unit 34,752 pek a ni a, chung zinga unit 32,566 chu pek bik nei loa a thlawna pek niin, voluntary donation hi 93.71% a tling a ni.

Kum 2024-25 chhung hian blood centre hrang hrangte'n blood donation camp vawi 611 an buatsaih a, chungah chuan thisen unit 22,602 pek a ni.

Association for Blood Donation (AVBD) chuan sawrkar lama hotute leh Mizoram mipuite tanrualna avangin voluntary blood donation-a target khûm theih a ni chu lawmawm an tih thu sawiin, AVBD Vice President Pu K Zothanpara chuan Good Friday lo thleng tur puala thisen pe theuh turin mipuite an sawm a ni.

<><><>

LENGPUI AIRPORT FORUM

Lengpui Airport chu Union Home Minister Amit Shah-a'n Airports Authority of India (AAI) kuta dah a nih tur thu a sawi chu chaktaka um zui turin Lengpui Airport Forum chuan sorkar a ngen.

Lengpui Airport Forum hi vawiin khan Aizawlah thukhawmin, an duh ang ngei a, AAI-in Lengpui Airport an la tur anga thil a awm ta chu lawmawm an ti a. Lengpui Airport chungchanga Union home minister tawngkam chu bawhzuia, state tana tha tur leh an duhdan te pawh sorkar laipuia thlenna remchangah la turin sorkar an ngen a, an pawl pawhin hemi chungchangah hian Union Home Minister leh chief minister te hmala zui tura ngenna a thawn dawn an ti a ni.

<><><>

AIZAWL FC

Zanin dar 7 hian tun season a I-League tawp ber chu khelh a ni dawn a, RG Stadium, Mualpuiah Aizawl FC leh Namdhari FC an inkhel dawn a, Aizawl FC hian I-League khel chhunzawm zel turin chak ngei an mamawh a ni.

India rama Football inelna sang ber dawttu I-League hi tunkarah zawh fel a ni dawn a, zanin hian I-League atanga tla tur chinfel a ni dawn a, I-League atang hian Team 2 chu inelna hniam lamah tla in I-League 2 atanga team hnih ti tha ten I-League khel turin an rawn inpet tling ve leh thin a, Tun Season ah Aizawl FC hi an khelh that tawk loh avangin dinhmun duhawmlah takah an ding mek a, a hnuai bera awm Delhi team chu tla chiang tawhin a hnuai ber dawt SC Bengaluru leh Aizawl FC hian point inang an hmu mek a, zanin hian Aizawl FC chuan Namdhari FC mikhualin season lo awm leh tura I-League khel tur chuan an chak a ngai tawh dawn a, midang inkhel a zirin chakloh pawha tling thei tho an ni.

Aizawl FC President MLA Pu Robert Romawia Royte chuan Aizawl FC I-League ah an awm zel theih nan zanin inkhel turah mipui thlawpna an mamawh takzet a ti a, Mipui club anih angin a hmuna en vek tur leh Aizawl FC tan vek turin mipuite a sawm a ni.

*Byte...Robert Romawia Royte.*

*Aizawl Football Club hi June ni 14, 1984 atanga bultan niin The People's Club tia hminglem vuah thin a ni a, kum 2016-2017 season khan khatih hunlaia India rama football inelna sang ber I-League champion an ni a, Mizoram Premier League ah leh inelna dangah pawh inlanin Mizo footballer tam tak a chher chhuak tawh a, Football hmanga hnamdangin Mizote an hriat theih nan kawng tam takah sulsutu niin rampawna Mizote ti hmingtha tu ber a ni.*

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM IN COLOMBO

India leh Sri Lanka chuan ralthuam, energy, leh sumdawnna lam tihhmasawna tur inremna an zia.

Vawiin khan Prime Minister Narendra Modia leh Sri Lanka President Anura Kumara Disanayake te chu Colombo ah an inkawm a. Ram pahni hruaitute hian thawhdunna awmsa te tihhmasawn dan tur an sawidun a. Inremna an ziah zingah ram venhimna, energy leh sumdawnnate a tel a ni.

Thuchhuah siamin Prime Minister Narendra Modia chuan President Disanayake chuan thuneihna a chan tirhin ramdang tlawh hmasak berah India a neih thu sawiin hei hian India leh Sri Lanka inlaichina thuk zia leh ngheh zia a tilang a ti a. India in thenawm ngaihpawimawh hmasak policy Neighbourhood First Policy a kalpuiah Sri Lanka chuan hmun pawimawh tak a chan thu leh sawiin Mission Security and Growth for All in the Region, SAGAR ah pawh ngaihpawimawh anih thu a sawi a ni.

<><><>

J&K

Danlova ramri kan ruk tum Pakistani mi pakhat sipaiten Jammu and Kashmir ah an kaphlum. Akahsavan-in BSF hnen atanga thu a dawn danin nizan khan Jammu-a R S Pura sector chhung Abudlian outpost bulah ramri kan ruk tum hi sipaite hian an kaphlum a. Amah hi a nihna tihchian tuma

hmalak mek niin a thil tihtum pawh chhui zui nghal a ni a. Hetianga dan kalha che an awm avang hian Pakistan sipaite hnenah pawh lungawilohna na taka thlen a nih thu BSF te chuan an sawi.

<><><>